



9. Oktober 2019

UKA 2019/72  
Aqqalu C.Jerimiassen

**Kalaallit Nunaanni Piartortut najugaqarfissaannik Naalakkersuisut pilersitsinissaq anguniarlugu suliaqarnissamik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens Napâtôk', Partii Naleraq)

Inoqatigut piartortut ataqqinninnermik tunitigit! Inoqatigaagut, naalliuuteqarnerinilu timimikkut anniaatinik annertuumik eqqugaaqqanerat paasillugu pitsaanerusementik paaqqutarineqarsinnaanerata suleqatigiilluta angusariaqarparput.

Atassummiik toqqaannaq oqaatigereersinnaavarput, qujanavissumik Partii Naleraq ima ittumik qaqqitaqarnera soqutigingaarlugu oqaloqataaffigerusukkatsigu.

Inoqatitta namminneq pisuussutiginnisaminnik piumassuserinngisaminnillu nappaammik eqqugaasimallutik perululernerminni, piartulernerminniluunniit paaqqutarilluarneqarnissaq atorfissaqartippaat, minnerunneqisumillumi paaqqutarineqarnermi ilaqtutaniik ungasippallaanginnissaq pisariaqarluni. Aap, suliaassartaa annertoqaaq pisariusinnaallunilu, taamaattoq qaqugukkulluunniit inoqatitta inuunerata pingaarnerujuarnera ersersissinnaajuaannartariaqarparput.

Utoqqartagut perululersimasut, eqqissinissartillu aggertillugu nallarfissamik paaqqutarineqarluni sullarissumik avaqqussinnaanngilaat, inummi ukiorpassuarni sulisimasoq ataqqillugu minnerpaamilluunniit eqqissilluni nallakarfissaqartariaqarneranik peqartissinnaasariaqaratsigu.

Oqartarpugut toqu inuunermet ilaaginnartoq, kikkut tamarmik aqqusaagassaringaat qaquguugaluarnerasoq, tamattami kinannguugaluarutta kinarsuugaluaruttaluunniit killissaqarpugut, suna tamarmi qaqugorsuarmut atuutinngilaq.

Atassummiik maluginiaquarputtaaq, kissaatigisimagatsigu Peqqinnissaqarfiup naalagaaffimmut utertinneqarsinnaanerata misissorneqarsinnaaneranut oqallinnissaq. Maannalumi unammilligassarpasuit assigiinngitsut pitillugit, imatullu ittumik "hospice"-imik pilersitsinissatsinnissaaq eqqartulersillutigu pingaartuuvoq nunatsinni aningaasaqarnitta nammakkersoqqinnissaanut qanoq immitsinnut oqarfigisinnaanersugut. Isumaqarpunga silatusaarnerusoq nassueruteqarsinnaaneq, nunatsinni nammassinnaasagut inuiaqatigiittut killeqarput, immitsinnut mangiarneroqqissinnaanngilagut, aningaasaq illuaniik illuanut mumeqattaartuutillugu qanoq isertitsissutigisinnaanerunerlugu atorsinnaanerunerluguluunniit ujartuiniartuarnitsinni naalagaaffeqatigiinnerup iluaniinnerput eqqaamasariaqarparput.



Tanngassimaarniarnerput nammineersinnaalluta paaqqutarinninnerlunnermik inuulluunniit inuuneranik naleqartariaqanngilaq.

Toqqammaviatigut ilaanarujussuaq Partii Naleqqap siunnersuutaa Atassummiik isumaqatigikuttoorparput, suliassallu maanna aallartilluartariaqarnera suli pitsaanagerusumik naalakkersuisunut anguniartittariaqaripput Atassummiik isumaqarpugut.

Taamak oqarninni toqqammavingaara, inoqatigut naalliuttut qanoq qinnutaasattaq tusartariaqartarneranut tunngatillugu. Aap, annernartaqaaq ilaatigut inuaqatigiittut paquminartutut isigineqarsinnaasut eqqartussatillugit. Inoqatigut aaqqeriarfeerullutik naalliuuteqalersimasut eqqissinissaminnillu kissaateqaannalernermik allaat pisinnaasut, (toqqaannaq oqaatigalugu) kissaataanik piviusunngortitsisinnaalernissaannik aqqtissiuussisinnaalernissaq eqqartugassaavortaaq imaannaanngitsoq. Nunatsinni piartortut najugaqarfissaannik pilersitsinissamik eqqarsaateqartilluta anguniagaqartillutalu, qallunaatut taaneqartartoq aktiv dødshjælp inunnut naalliuuteqarujussualersimasunutaaq ammaanqarsinnaanera eqqarsaasersuutigisinnaasariaqarparput, aap, artornarpalukkaluaqaaq eqqarsaatigalugu, taamaattorli ajornerussaaq inoqatinnguarput ikioriarfeerutereersimasoq naalliorusaartoq inuuneranik sivitsorsaavigerusaartuarnissaa nakorsaasersorusaarlugu, uffa nammineq isinik takusinnaalereerlugu qanoq naalliutsiginera.

Qaa inoqatigut piartornerminni eqqissillutik nallarfissaqarnissaat ataatsimoorunniartsigu.

Tamannalu pillugu Atassummiik siunnersuut taperserlugu Ilaqutareeqarnermut Peqqissutsimullu ataatsimiitsitaliamut ingerlanneqarnissaa innersuupparput.